




ÚDARÁS
CRAOLACHÁIN
NA HÉIREANN

BROADCASTING
AUTHORITY
OF IRELAND



Beartas Foghlama agus Forbartha Earnála an BAI

Leagan athbhreithnithe

Meitheamh 2021

Réamhrá

Is é Alt 26 (2) den Acht Craolacháin, 2009 a chuireann an bonn reachtúil ar fáil do ról forbartha Údarás Craolacháin na hÉireann (“an BAI”) san earnáil craolacháin agus closamhairc in Éirinn.

Aithníonn an BAI an tábhacht a bhaineann le sármhaitheas sa chraoltóireacht agus in ábhar agus i seirbhísí closamhairc a spreagadh agus a chothú trí infheistíocht leanúnach agus nuálaíocht a chur chun cinn san earnáil mar a léirítear i Ráiteas Straitéise 2021-2023. Glacann an BAI lena ról maidir le cultúr forbartha agus oiliúna agus foghlama ar feadh an tsaoil a chothú agus a chaomhnú laistigh den earnáil. Tá an BAI tiomanta de bheith ag obair go leanúnach i gcomhpháirtíocht le craoltóirí agus le líonraí tionscail chun dul i ngleic le riachtanais forbartha ar leith a dhéanfaidh an acmhainn san earnáil a fheabhsú. I ndeireadh na dála, is bealach atá san infheistíocht sin i bhfoghlaim agus i bhforbairt inar féidir le seirbhísí craolacháin freagairt do leasanna agus riachtanais lucht féachana na hÉireann.

Cuireann Beartas Foghlama agus Forbartha Earnála an BAI an creat ar fáil le cur ar chumas an BAI fás agus forbairt leanúnach na hearnála a phleanáil, a thomhas agus a mheasúnú ó thaobh na straitéise de agus tacú leis, le meascán éagsúil de ghníomhaíochtaí oiliúna, foghlama agus forbartha agus de chineálacha cur chuige laistigh dá raon feidhme reachtúil agus straitéiseach. Léirítear príomhthéamaí Chlár Foghlama agus Forbartha Earnála an BAI don bhliain 2021 agus ina dhiaidh sin sa Bheartas seo atá bunaithe ar chuspóirí, feidhmeanna agus dualgais an BAI mar a leagtar amach iad in Acht Craolacháin 2009 agus i Ráiteas Straitéise an BAI 2021-2023.

Leagtar amach an comhthéacs ar forbraíodh an Beartas laistigh de in **Aguisín 1** den doiciméad seo.

1. Aidhm an Bheartais

Is é aidhm an Bheartais seo ná creat a chur ar fáil d'Údarás Craolacháin na hÉireann (an BAI) le go mbeidh an tÚdarás in ann dul i dteagmháil go straitéiseach le craoltóirí agus príomhpháirtithe leasmhara earnála closamhairc eile chun a gcuid riachtanais forbartha a aithint agus chun straitéisí a ghlacadh a thabharfaidh tacaíocht don earnáil maidir lena ról a fhorbairt agus a neartú laistigh de thimpeallacht níos leithne na meán. Díritear sa Bheartas ar an ngá atá le feabhsuithe leanúnacha ar aschuir craolacháin agus ar fheabhsúchán ar chumas na hearnála craolacháin a hacmhainn a bhaint amach leis na tionscail chruthaitheacha, agus tacaítear leis an méid sin ann. Cuireann an Beartas creat foghlama agus forbartha ar fáil a chuireann ar chumas an BAI tacú go héifeachtach le fás agus le forbairt na hearnála craolacháin in Éirinn. Léirítear raon leathan de chineálacha cur chuige agus de thionscnaimh sa Bheartas seo atá comhsheasmhach le sainchúram reachtúil agus rialála foriomlán an BAI.

I bhfianaise na ndúshlán atá ann de thoradh na neamhchinnteachta eacnamaíochta, déanann an BAI iarracht tacaíocht a sholáthar, i bhfoirm airgeadais nó i bhfoirm eile, do chraoltóirí agus do líonraí tionscail atá ag streachailt chun acmhainn a thógáil laistigh dá n-earnáil a oiread agus is féidir. Léireoidh an méid tacaíochta a sholáthróidh an BAI an méid acmhainní agus maoinithe atá ar fáil ón BAI ag am áirithe ar bith.

2. Cuspóirí an Bheartais

Forbraíodh Cuspóirí an Bheartais seo a leanas chun cúnaimh a thabhairt don BAI maidir lena shainchúram reachtúil a chomhlíonadh agus a spriocanna straitéiseacha a bhaint amach; soláthraítear struchtúr straitéiseach freisin ina ndéantar gníomhaíochtaí foghlama agus forbartha earnála an BAI a fhorbairt, a chur i bhfeidhm, a thomhas agus a mheas.

Is iad seo a leanas na príomhchuspóirí:

- (i) Cur le forbairt na gcaighdeán a bhaineann le rialachas, daoine agus ábhar san earnáil craolacháin agus closamhairc, lena n-áirítear tabhairt faoi oiliúint chreidiúnaithe agus forbairt ghairmiúil leanúnach na ndaoine atá ag obair san earnáil.
- (ii) Comhoibriú le comhlachtaí ionadaíochta ar leith an tionscail chun gníomhaíochtaí oiliúna a chur chun cinn i réimsí ina bhfuil easpa scileanna san earnáil chraolacháin.
- (iii) Faisnéis agus sonraí faoin earnáil craolacháin agus closamhairc sa Stát a bhailiú agus a scaipeadh. Go sonrach, faisnéis agus sonraí a bhailiú agus a scaipeadh maidir le riachtanais scileanna na hearnála craolacháin agus closamhairc d'fhonn tacú le líonraí tionscail agus le craoltóirí chun aghaidh a thabhairt go héifeachtach ar a riachtanais forbartha féin agus ar riachtanais a gcuid comhaltaí.

- (iv) Comhoibriú le comhlachtaí eile lasmuigh den Stát a chomhlíonann feidhmeanna atá comhchosúil le feidhmeanna an BAI ar mhaithe le monatóireacht a dhéanamh ar fhorbairtí sa chraolachán go náisiúnta agus go hidirnáisiúnta araon maidir le forbairt eanála.
- (v) Taighde d'ardchaighdeán a ghabháil de lámh, a spreagadh agus a chothú chun naisc a fhorbairt agus a choinneáil idir an BAI, institiúidí tríú leibhéal, agus an earnáil craolacháin agus closamhairc.
- (vi) Tacaíocht a thabhairt do líonraí tionscail agus do chraoltóirí maidir leis an feidhmiú is oiriúnaí, is éifeachtaí agus is comhsheasmhaí dá dtionscnaimh forbartha, agus úsáid meascán de chur chuige agus de mhodheolaíochtaí foghlama, oiliúna agus forbartha a spreagadh a fhreagraíonn do na leasanna agus do na riachtanais éagsúla san earnáil.

3. Prionsabail Rialála

Baineann na Prionsabail Rialála seo a leanas le Beartas Foghlama agus Forbartha Eanála an BAI agus léiríonn siad croíluachanna an BAI féin mar atá leagtha amach i Ráiteas Straitéise an BAI 2021–2023. Bíonn na croíluachanna seo mar bhonn faoi chinnteoireacht agus oibríochtaí an BAI agus cuireann siad treoir ar fáil maidir le gníomhaíochtaí Foghlama agus Forbartha Eanála an BAI a chur i bhfeidhm laistigh den earnáil craolacháin agus closamhairc.

Tá muid:

- **Inár Saineolaithe** – trí eolas a fháil dúinn féin trí rannpháirtíocht, taighde agus tiomantas don fhoghlaim ghairmiúil.

Léirítear tiomantas an BAI a bheith ina eagraíocht shaineolach féin ina tiomantas chun saineolas na hearnála a fhorbairt trí thacú le forbairt leanúnach na hearnála agus trí straitéisí foghlama neamhfhoirmiúla agus foirmiúla a chur chun cinn. Tugann an BAI spreagadh gníomhach do líonraí tionscail agus do chraoltóirí chun saineolaithe a bhaineann go sonrach leis an earnáil agus / nó cúrsaí creidiúnaithe a úsáid chun a saineolas agus a eolas laistigh den earnáil a mhéadú. Aithníonn an BAI a ról atá aige chun taighde a spreagadh agus a sholáthar a éascóidh an BAI agus an earnáil freastal ar riachtanais lucht féachana agus éisteachta in Éirinn.

- **Cuntasach** – inár gcinntí, inár rialachas, agus inár gcuid acmhainní.

Tá an BAI tiomanta a bheith freagrach agus trédhearcach i ngach ábhar a bhaineann lena gníomhaíochtaí forbartha eanála. Tá sé d'aidhm aige oibriú ag an gcaighdeán rialachais is airde le próisis agus rialuithe iomchuí i bhfeidhm a ndéanfar iniúchadh neamhspleách orthu ó am go ham.

Bíonn an BAI ag súil le hardchaighdeáin rialachais ó líonraí tionscail agus ó chraoltóirí ina n-úsáid maoiniú poiblí agus ina gcleachtais, agus ba cheart dóibh a ndícheall a dhéanamh a bheith chomh hairdeallach ó thaobh costais agus chomh héifeachtúil agus is féidir.

- **Solúbtha agus Oiriúnaitheach** – inár gcuid cleachtais agus bpróiseas rialála.

Bíonn an BAI freagrúil solúbtha laistigh de thimpeallacht meán atá ag athrú agus cuireann sé fáilte roimh dhul chun cinn teicniúil agus roimh cruthaitheacht agus nuálaíocht ó thaobh forbairt earnála de. Glacann an BAI le modhanna nua chur chuige a thriail agus é féin a chur in inmhe do mhodheolaíochtaí nua oiliúna agus forbartha le bheith in oiriúint do riachtanais éabhlóideacha agus éagsúla na hearnála. Nuair is cúí, tacaíonn an BAI le réitigh nuálacha a thriail ar bhonn píolótach a fheabhsaíonn forbairt scileanna agus inniúlachtaí san earnáil agus a fhreastalaíonn freisin ar leas an phobail i gcoitinne.

- **Cothrom** – inár bpróisis, inár nósanna imeachta agus inár gcinntí.

Bíonn cothroime agus cothromaíocht le feiceáil i ngach próiseas, nós imeachta agus cinneadh a dhéanann an BAI chun a chuspóirí a chur chun cinn. Cuirfidh an BAI faisnéis agus treoir mhionsonraithe ar fáil faoina phróisis mhaoinithe do thionscadail foghlama agus forbartha earnála. Cuirfidh sé réasúnaíocht shoiléir ar fáil freisin maidir lena chinntí maoinithe agus tacaíochta agus tabharfaidh sé aiseolas do gach iarratasóir.

- **Neamhspleách** – oibrímid mar rialálaí neamhchlaonta.

Dearbhaíonn an BAI a neamhspleáchas agus a neamhchlaontacht sna cúrsaí craolacháin ar fad lena n-áirítear a ghníomhaíochtaí beartais um fhorbairt earnála. Aithníonn sé na difríochtaí agus na riachtanais earnála atá ann idir craoltóirí poiblí, tráchtála agus pobail agus aithníonn sé go bhfuil raon an-éagsúil riachtanas san earnáil closamhairc.

4. Prionsabail Oibriúcháin

Sa bheartas seo déantar iarracht díriú ar obair Fhoghlaim agus Forbartha Earnála an BAI faoi cúig phrionsabal oibriúcháin uileghabhálacha. Eascraíonn na prionsabail seo ó oibleagáidí reachtacha agus straitéiseacha an BAI agus ó chomhairliúchán le líonraí tionscail agus le craoltóirí. Tá siad mar chuid lárnach de ghníomhaíochtaí Forbartha Earnála an BAI agus is iad a chuirfidh cruth ar an tionscal craolacháin agus closamhairc in 2021 agus ina dhiaidh sin.

i. Ag obair i gcomhpháirtíocht

Tá an BAI tiomanta tacaíocht a thabhairt agus cur ar chumas na hearnála a bheith rannpháirteach ina hoiliúint agus ina forbairt féin agus treoir a thabhairt di dá réir. Admhaítear sa Bheartas go n-athróidh an caidreamh a bheidh ag an BAI le haon chomhpháirtíocht ag aon am de réir mar a athraíonn an earnáil agus de réir chéim forbartha na comhpháirtíochta. Tá cur chuige solúbtha, tacúil glactha ag an BAI ach táthar ag súil go gcuirfidh comhpháirtithe dea-chleachtas i bhfeidhm maidir lena n-oibríochtaí agus a dtionscnaimh forbartha earnála.

Aithníonn an BAI go bhfuil ról lárnach ag baint le bheith ag obair le comhpháirtithe chun torthaí rathúla a chur ar fáil ó thaobh forbartha earnála de. Féachfaidh an BAI le modhanna cumarsáide láidre a fhorbairt agus a chothú trí:

- A chinntiú go dtuigeann craoltóirí agus líonraí tionscail na ról, na feidhmeanna agus na teorainneacha atá ag an BAI ó thaobh Forbartha Earnála de.
- Gníomhaíochtaí tras-líonra agus idir craoltóirí a éascú, a spreagadh agus a chur chun cinn.
- Naisc a chumasú agus a fhorbairt idir príomhpháirtithe leasmhara chun cur chuige comhoibritheach a chothú maidir le forbairt earnála.

ii. Pleanáil Straitéiseach

Is é an cuspóir straitéiseach atá ag an BAI ná dul i dteagmháil le craoltóirí agus líonraí tionscail agus tacaíocht a chur ar fáil dóibh lena gcuid riachtanais forbartha agus foghlama earnála ar fud na hearnála. Sa chomhthéacs seo, tá an BAI tiomanta oibriú i gcomhpháirtíocht le craoltóirí agus le líonraí tionscail chun an caighdeán a leagan síos le haghaidh pleanáil straitéiseach agus fhadtéarmach laistigh den earnáil.

Tá sé mar aidhm ag an BAI tacaíocht agus treoir a thabhairt do líonraí tionscail agus do chraoltóirí d'fhonn ardchaighdeán a chinntiú maidir le smaointeoireacht agus pleanáil straitéiseach chun gníomhaíochtaí forbartha earnála a neartú agus chun tacú le torthaí d'ardchaighdeán.

Ba cheart go léireodh pleananna oibre bliantúla na gcraoltóirí agus na líonraí tionscail cuspóirí agus tosaíochtaí straitéiseacha an BAI.

iii. Tomhas agus Meastóireacht

Tuigeann an BAI an tábhacht a bhaineann le tomhas, meastóireacht agus anailís a dhéanamh ar thorthaí gníomhaíochtaí forbartha earnála agus gabhann an BAI air féin oibriú i gcomhpháirtíocht le comhlachtaí a sholáthraíonn oiliúint don earnáil ina leith seo. Nuair is cuí, cuirfear na sonraí a bhailítear ar fáil do chraoltóirí agus do líonraí ábhartha an tionscail chun cabhrú le pleanáil straitéiseach a gcuid gníomhaíochtaí foghlama agus forbartha agus chun é a threorú.

Tá an BAI tiomanta tacaíocht a chur ar fáil do chraoltóirí agus do líonraí tionscail chun tomhas agus meastóireacht a dhéanamh ar a gcuid gníomhaíochtaí foghlama agus forbartha. Déanfar an earnáil a chothú agus a spreagadh chun córais láidre tomhais agus meastóireachta a phleanáil agus a chur san áireamh in aon tionscnamh foghlama, oiliúna agus forbartha a ghabhann siad de láimh.

iv. Maoiniú agus Tacaíochtaí eile

Tá aird dírithe ag craoltóirí agus ag líonraí tionscail ar mhaoiniú do ghníomhaíochtaí Forbartha Earnála mar chuid lárnach de ról an BAI. Aithníonn an BAI a ról féin i maoiniú agus tacaíochtaí eile a sholáthar chun fás leanúnach ar fhoghlaim agus ar fhorbairt in earnáil craolacháin agus closamhairc na hÉireann a spreagadh.

Léireoidh tacaíocht mhaoinithe, de réir mar a bheidh fáil uirthi, riachtanais forbartha reatha an tionscail ag aon am faoi leith. Féadfaidh an BAI tosaíochtaí maoinithe a shocrú de réir riachtanais an tionscail, cuspóirí straitéiseacha an BAI féin agus prionsabail oibriúcháin agus cuspóirí an Bheartais seo.

Léireofar infhaighteacht acmhainní an BAI tráth ar bith sa mhéid tacaíochta praiticiúla a chuirfidh an BAI ar fáil don earnáil. Féadfaidh an BAI iarratais ar mhaoiniú i gcomhair tionscadal forbartha a mheas ar bhonn bliantúil nó ilbhliantúil, más cuí.

v. Acmhainní a Fhorbairt don Earnáil Chraolacháin

Glacann an BAI straitéisí a thugann tacaíocht don earnáil maidir lena ról a fhorbairt agus a neartú laistigh de thimpeallacht níos leithne na meán.

Tá an BAI tiomanta acmhainní a fhorbairt agus inbhuanaitheacht a neartú san earnáil chraolacháin agus closamhairc trí thacú le réimse tionscnamh forbartha Earnála, amhail:

- Taighde a dhéanamh maidir le riachtanais agus bearnaí forbartha trí anailís ar riachtanais na hEarnála agus trí mheicníochtaí eile.
- Maoiniú agus tacaíochtaí eile do thionscnaimh foghlama agus forbartha a sholáthar a bhfuil sé mar aidhm acu cruthaitheacht agus nuálaíocht a fheabhsú san earnáil craolacháin agus closamhairc.
- Maoiniú agus tacaíochtaí eile do thionscnaimh foghlama agus forbartha a sholáthar a bhfuil sé mar aidhm acu inbhuanaitheacht chomhshaoil, shóisialta agus airgeadais a fheabhsú.
- Craoltóirí agus líonraí tionscail a chur ar an eolas, nuair is féidir agus nuair is cuí, maidir le samhlacha foghlama ‘dea-chleachtais’ an tionscail a bhfuil sé d’aidhm leo breisluach a chur ar fáil do gach páirtí.

5. Athbhreithniú ar an mBeartas

Beartaíonn an BAI athbhreithniú a dhéanamh ar an mBeartas seo gach ceithre bliana ar a laghad, le héifeachtacht agus éifeachtúlacht ó thaobh feidhmiú na dtionscnamh a thagann as an mBeartas a chinntiú de réir éabhlóid na hearnála. D'fhéadfadh athbhreithnithe tarlú níos minice ná sin, más gá agus nuair is gá, chun athruithe sa timpeallacht reachtúil, straitéiseach, tionscail nó rialála a léiriú nó mar fhreagairt ar athruithe struchtúracha san earnáil chraolacháin agus closamhairc.

AGUISÍN 1 Creat Beartais

Forbraíodh agus dréachtaíodh Beartas Foghlama agus Forbartha Earnála an BAI laistigh de chreat a chuimsíonn forálacha reachtúla ar leith d'Acht Craolacháin 2009 agus cuspóirí ábhartha Ráiteas Straitéise an BAI 2021-2023.

1. Forálacha Reachtúla

Leagtar feidhmeanna coimhdeacha an BAI amach in Alt 26 (2) den Acht Craolacháin, 2009 agus soláthraítear an bonn reachtúil ar a ndearna an BAI a ról sa réimse sin a fhorbairt.

Tá na feidhmeanna coimhdeacha seo a leanas ag an BAI -

- a) faisnéis a bhailiú agus a scaipeadh maidir leis an earnáil chraolacháin sa Stát,
- b) faireachán a dhéanamh ar fhorbairtí ar an gcráolachán go hidirnáisiúnta,
- c) taighde a thionscnamh, a eagrú, a éascú agus a chur chun cinn maidir le nithe craolacháin,
- d) faisnéis a bhailiú agus a scaipeadh i ndáil le riachtanais na hearnála craolacháin maidir le scileanna,
- e) comhoibriú le comhlachtaí eile, lena n-áirítear comhlachtaí ionadaíocha laistigh den earnáil chraolacháin, chun gníomhaíochtaí oiliúna a chur chun cinn i réimsí san earnáil chraolacháin ina bhfuil easpaí ó thaobh scileanna de,
- f) comhoibriú le comhlachtaí eile lasmuigh den Stát a chomhlíonann feidhmeanna atá comhchosúil le feidhmeanna an BAI, agus
- g) taighde, bearta agus gníomhaíochtaí a ghabháil de lámh, a spreagadh agus a chothú, atá dírithe ar litearthacht ó thaobh na meán a chur chun cinn, lena n-áirítear comhoibriú le craoltóirí, le hoideachasóirí agus le daoine iomchuí eile.

2. Ráiteas Straitéise an BAI 2021-2023

Tugann an BAI tiomantas ina Ráiteas Straitéise 2021-2023 foghlaim agus forbairt san earnáil chraolacháin a éascú, nuálaíocht a chothú, agus cabhrú leis an earnáil inbhuanaitheacht airgeadais a bhaint amach.

TÉAMA STRAITÉASACH 5 – AN NUÁLAÍOCHT AGUS AN INBHUANAITHEACHT EARNÁLA A THREISIÚ

- Cuspóir Straitéiseach 5.1: *An chruthaitheacht agus an nuálaíocht a mhéadú mar ghnéithe sainiúla d'earnálacha fuaimne agus closamhairc na hÉireann.*

Toradh 5.1: Tá an chruthaitheacht agus an nuálaíocht ina bhfócas do ghníomhaíochtaí tacaíochta earnála BAI (lena n-áirítear an Scéim um Maoiniú Craolacháin agus Forbairt Earnála BAI).

- Cuspóir Straitéiseach 5.2: *Tacú le hinbhuanaitheacht airgeadais fheabhsaithe a bhaint amach d'earnálacha fuaimne agus closamhairc na hÉireann.*

Toradh 5.2: Tá inmharthanacht fhadtéarmach na n-earnálacha fuaimne agus closamhairc in Éirinn feabhsaithe ag tionscnaimh de chuid BAI sa réimse seo.


Ina theannta sin, léiríonn prionsabail an Bheartais Forbartha Earnála croíluachanna an BAI mar atá liostaithe i Ráiteas Straitéise 2021-2023.




ÚDARÁS
CRAOLACHÁIN
NA hÉIREANN | BROADCASTING
AUTHORITY
OF IRELAND

Broadcasting Authority of Ireland

2 - 5 Warrington Place
Dublin D02 XP29

 353 1 644 1200

 info@bai.ie

 www.bai.ie

 [@baitweets](https://twitter.com/baitweets)

Designed by **Wonder Works**